

欽定剿平粵匪方略

欽定勦平粵匪方略卷三百十三 壬戌年

七月初二日癸未勝保奏言臣折回太和後分起

拔營前進據鄭元善畧稱粵匪業由裕州葉縣一帶南竄臣所派副將王佐臣管帶馬隊一千餘名已由郾城舞陽一路跟蹤追剿如何接仗情形現尙未據稟報此次臣帶馬步三千餘名合之項城兵勇四千名俱由臣親統取道項城

商水一帶節節前進僥賊勢愈趨愈南或竄入  
楚境楚省兵力素稱精銳諒此股竄賊無難聚  
而殲旃豫皖境內捻氛未靖未便越境窮追轉  
致不能兼顧如竄賊仍盤踞豫境自當實力勦  
洗迅殄逆氛奏入

上命議政王軍機大臣傳諭勝保鄭元善曰粵賊竄  
回豫境由裕州葉縣一帶南竄勝保所派之副將

王佐臣一軍已由郾城舞陽跟蹤追勦著鄭元善  
督飭豫省兵勇併力夾攻務將此股竄賊殲除淨  
盡勿令闖入楚境致勦辦又煩兵力勝保現擬親  
督馬步各隊取道項城商水節節前進著將豫省  
腹地迅速廓清仍遵疊次諭旨統率大隊馳赴洛  
陽駐紮俾各股捻匪不敢再行出擾則豫省西陲  
益臻穩固

初七日戊子鄭元善奏言出關髮逆與東來另股

紛駛宛屬六月初七日直撲泌陽縣城知縣溫

逢春會營督團奮力抵禦斃匪數十名初八日

溫逢春帶練繞擊在南河灣地方生擒僞軍政

司錢效用等二名長髮老賊十六名該匪由大

磨翻山逃竄初九日攻桐柏縣城知縣劉廷章

督率兵團擊退十一日該逆大股復至焚掠關

廂劉廷章督軍固守連開槍礮斃賊數名該逆  
拏死圍攻至兩日一夜之久我軍守禦不懈始  
撤向吳城鎮王老莊一帶屯聚鄖西退出之賊  
復由浙川內鄉入豫掠鄉攻城經該地方官擊  
退復擾及鎮鄧一帶圍勇迎敵屢有斬擒十三  
日攻新野縣城我軍連開大礮將賊轟退十七  
日竄入唐縣知縣高天寵督團截勦殲賊三百

餘名救出難民千餘人該逆向井樓安篷一帶  
奔逸查宛屬竄匪雖經兵團屢擊尙未大受懲  
創臣與勝保毛昶熙派撥各軍均由南陽鎮總  
兵圖塔納統帶分路追勦又添撥各營交參將  
盧得勝由汝郊取道赴宛以厚兵力並請  
飭下勝保親督馬步勦辦宛屬竄匪以杜釁捻勾結

奏八

上命議政王軍機大臣傳諭勝保鄭元善曰宛屬竄匪曇撲泌陽桐柏縣城雖經兵團截擊並未大受懲創此股髮逆狼奔豕竄肆行衝突必得勁軍痛加勦擊方足以殄兇鋒勝保前奏所派王佐臣一軍由郾城舞陽追勦曾否與賊接仗尙未據勝保續奏現在宛郡情形緊急著勝保仍遵前旨迅速起程馳赴洛陽扼要駐紮其宛屬賊匪著飭王佐

臣一軍探賊所向迎頭截擊其參將盧得勝等所  
帶豫軍著飭令與之會合併力夾攻痛殲醜類毋  
令再與捻匪勾結

初八日己丑袁甲三奏言據李世忠呈稱金陵踞  
逆自楚皖會攻九洑洲楚師礮船駛抵頭關該  
逆卽不許商船上下江路不通李世忠因九洑  
洲以北本有舊河一道計長三十餘里日久淤

塞幾如平地隨卽集夫挑空以通上下游船隻  
往來之路現已工竣我軍卽依河爲營將九洑  
洲長圍逼困六月十四十五等日該逆潛襲我  
軍頭營我軍先有準備均經擊退連日江水泛  
漲我軍江邊營盤多半被淹現移紮高阜並添  
隊前往助勦屢次誘敵賊總不出已成持久之  
勢該逆又因前犯石埠橋未得逞志並經藩司

曾國荃屢次痛勦愈不甘心現糾蘇常大股數萬人屬聚金陵三十里之純化鎮地方距石埠橋僅二十五里已飭石埠橋前敵將弁等嚴密防範等情並據該提督呈到與曾國荃往來信函聲勢尙屬聯絡惟該營餉需久紓山陝月撥又復不能應時批解李世忠頗以爲慮臣亦代爲焦灼江北糧臺能否另籌接濟臣已咨商吳

棠妥籌辦理以固軍心並囑李世忠督飭南北各營將弁謹守營盤謀定後戰但能幾次痛懲援賊計窮則城賊膽落自有可乘之機其一切進止機宜仍聽候曾國藩調度現在甯國府城榮經克復鮑超一軍或會攻金陵以厚兵力或先翦旁近州縣以孤賊勢想曾國藩早已斟酌辦理

袁甲三又奏言臣患病已三月有餘又值暑雨連旬溼熱交侵病勢時增時減軍情重大遇事不敢不殫思竭慮勞心愈甚求效愈難以臣受恩深重卽肝腦塗地抑又何辭第恐以病軀承乏難免貽誤查臨淮爲南北重鎮設有疏虞各路軍務均爲掣動情形極爲喫重臣病旣難再支不敢不據實直陳李續宜到皖數月臣屢與籌商

軍務知其沈毅果決識力堅定實能肩此重任  
可否仰懇

天恩飭令李續宜以巡撫接受

欽差大臣關防准臣開缺回籍調理其未經交卸以

前臣仍當力疾支持盡心籌辦奏入

上命議政王軍機大臣傳諭曾國藩袁甲三李續宜

日袁甲三患病已久勢難再支恐以病輶躬誤自

周實在情形業經明降諭旨准袁甲三開缺調理  
將欽差大臣關防交李續宜祇領接辦矣李續宜  
身任皖撫現復授爲欽差大臣皖省軍情責無旁  
貸臨淮爲皖北要地李續宜前由六安進紮原爲  
督攻廬州此時廬州已克應否移軍進紮臨淮以  
資控制卽著妥籌迅止李世忠一軍南岸扼守石  
華橋北岸進攻九洑洲據袁甲三所奏各情尙爲

合宜李世忠性雖驕悍材勇尙爲可用經袁甲三  
數載以來拊循激勵亦尙能盡其力現方籌攻金  
陵此軍於南北兩岸扼勦均甚切要李續宜接辦  
後亦應妥爲駕馭將材難得當此用人之際諒該  
大臣亦必能盡將將之道使之鼓舞樂爲所用並  
飭諸軍務與同心効力毋或意見參差李續宜未  
到臨淮以前仍著袁甲三竭力籌辦不准存五日

京兆之心侍講袁保恆仍著留營歸李續宜調遣  
至袁甲三奏甯國府城業經克復鮑超一軍或會  
攻金陵或先翦旁近州縣以孤賊勢曾國藩自己  
斟酌辦理等語甯國一城何時克復是否的實鮑  
超一軍作何調遣著曾國藩迅速具奏

上諭內閣曰袁甲三奏病勢增劇懇恩開缺袁甲三  
著准其開缺回籍調理前因壽州失陷袁甲三與

翁同書共辦一事且有督辦軍務之責降旨交部  
嚴加議處當經吏部議以革職惟念該大臣督辦  
安徽軍務時閱三載雖未能卓著戰功而時值艱  
危袁甲三竭力支持一切尙臻穩練該部所議袁  
甲三應得革職處分著加恩寬免

上又諭內閣曰安徽巡撫李續宜著授爲欽差大臣  
督辦安徽全省軍務

初九日庚寅李鴻章奏言浦東一軍攻克曹涇鎮

後六月十四日潘鼎新等營由曹涇進紮南沙  
距金山十五里潘鼎新等議以近城二里許賊  
營團紮海塘擋路設卡左海右河若不力破此  
卡無由直薄城根會商劉玉林帶隊前往察看  
劉玉林見右河埂下賊椿擋處水尙不深遂同  
方有才等鳧水而過掩至塹邊鼎銘二營繼至

前後夾擊火器齊施延燒賊柵遂乘逆衆驚惶  
搶拔籤樁劉玉林等踰濠齊進賊首憑牆指揮  
被我軍迎面砍倒衆匪紛紛出竄斃於河海刀  
矛者無數城中大股來援復經擊退我軍回營  
後賊連夜修整營卡益以死守十七日潘鼎新  
令軍功潘鼎琛等率三成隊伍復攻此卡賊聞  
然撤退潘鼎琛等乘勝追至城下斬馘數十級

我軍亦有傷亡正撤隊間南門突出賊二千餘衆鑭擁奔來我軍整隊徐退離城約五六里適潘鼎新等帶親兵三十餘人由三陽等處探視金山衛東北地勢猝遇賊衆見人數甚少直前兜裏劉銘傳槍斃騎馬賊目賊衆稍卻因令劉玉林移營進紮三陽賊遂盡逃入城十八日參將覃聯陞由奉賢帶隊亦到南沙十九日同都

司胡鵬飛由海塘直抵城根賊於城外設伏誘  
戰覃聯陞偵知有伏飭令各哨勇丁按隊徐行  
當派守備陳德勝高振彪左右攻擊文清林周  
河清率前後哨排列槍礮以防抄截覃聯陞自  
率親兵策應衝突再四覃聯陞奮不顧身衝入  
賊隊親兵從旁猛開劈山大轟擊倒馬賊衆哨  
亦合爲一處正相持閒潘鼎新先派把總徐道

奎帶隊由坂中突出接應單聯陞督戰益急賊匪撤退入城是晚副將華爾參將李恆嵩帶常勝軍一千餘名先後到營二十日直逼城下潘鼎新率同胡鵬飛劉玉林進紮金山東門外察看地勢約分四門會勦我軍甫開槍礮據報劉玉林已先入城賊大股向西北潛遁潘鼎新等一面派隊跟追一面入城分營布守卽於六月

二十一日克復金山衛城該逆竄往浙境從此  
浦東肅清門戶可守堪慰

聖塵此次陣亡守備陳德勝千總文清林應請  
飭部從優議卹其尤爲出力之江蘇補用知府潘鼎  
新等先行開列額懲

天恩分別獎勵其餘在事出力文武員弁兵勇容臣  
彙入南匯虹橋請獎案內擇尤保奏

李鴻章又奏言臣同黃翼升於六月十六日行抵松江十七日由泖湖赴澱山湖該處係青浦崑山蘇州吳江交界直達蘇境之太湖其東岸有已革提督曾秉忠所部礮船扼守西南北岸處處賊區臣與黃翼升督同淮揚四營駛往巡視十八日黃翼升巡至離蘇州七十里之周莊鎮見水陸賊軍踞橋爲卡飭令副將王東華等

排礮齊攻焚燬賊卡逆衆登岸開洋槍抵抗黃翼升督軍截住賊船擋頭夾擊王東華等帶隊上岸迎剿賊紛紛敗走黃翼升由後河抄出當將賊巢燒燬共殺賊十餘名焚奪賊船十餘隻十九日復回泖湖會合曾秉忠由章練塘等處繞至洙涇漸近浙江嘉善平湖各縣邊界二十二日回至上海老營查松江以西與蘇州接壤

南與嘉興接壤湖河泛漲港汊縱橫岸低橋少  
水戰最宜將來夾攻蘇浙必須由此取徑惟而  
而皆通須有得力三板飛划四五百號乃敷分  
進牽制之用黃翼升所帶戰船僅二百號除分  
撥金陵揚州六營共百二十號外到滬僅八十  
號臣現將黃浦舊存礮船修整改造三四十號  
尙未竣工仍須會商曾國藩另籌辦法淮揚水

師自去春成軍協戰鄂皖江西各處血戰踰年  
克復名城數十此次由九洑洲賊壘橫衝而下  
弁勇傷亡近百名船身多被礮洞穿須趁三伏  
油艙修補臣商令曾秉忠嚴束所部分堵各隘  
日俟黃翼升船隻修好再行添調前往抽替會  
籌防勦奏八

上命議政王軍機大臣傳諭李鴻章曰金山衛爲江

浙要衝現經官軍攻克則地勢軍情均可得手卽  
著督飭各軍攻克青浦嘉定俾上海益形鞏固前  
據慶端奏稱浙江省紳團收復甯波鎮海奉化象山  
慈谿郡縣五城乘勝進攻新昌等處疊諭左宗棠  
派兵進剿而該撫駐師衢州難以兼顧現旣克復  
金山則對岸卽係餘姚著李鴻章探明情形咨商  
曾國藩酌量妥辦於逆兵籌餉均有裨益降曾劉

玉林已准以都司補用並賞戴花翎惟此輩半多  
桀驁不馴務當隨時察看恩威並用方可始終如  
一以收實效籌辦三板飛划以爲追勦蘇嘉之用  
甚爲妥協該處汊港狹隘長江師船運掉不靈卽  
著商同曾國藩迅速籌辦務令足敷應用免致臨  
時掣肘浦東旣已肅清鎮江情形仍須隨時探明  
如果軍情較緊著分撥兵勇留防上海卽親統所

部前往駐紮

上諭內閣曰官軍克復金山衛城浦東一律肅清勦  
辯尙屬得手所有陣亡之守備陳德勝千總文清  
林均著交部從優議卹尤爲出力之江蘇補用知  
府潘鼎新著免補知府俟服闋後遇有江蘇道員  
缺出請旨簡放並賞戴花翎都司劉銘傳著免補  
遊擊以參將仍留江蘇補用並賞給驃勇巴圖魯

名號參將覃聯陞著以副將儘先推補劉玉林著  
以都司補用並賞戴花翎參將李恆嵩著開復革  
職留任處分其餘出力文武員弁兵勇著李鴻章  
查明彙入南匯等處請獎案內擇尤保奏

十四日乙未鄭元善奏言據報前由鄆西退出賊  
匪經唐縣官軍截勦奔竄井樓一帶六月十八  
日遊擊徐榮柱帶兵與副將伊里納會合擊

賊於白林莊斃匪五百餘名十九日馳抵井樓  
我軍直前抄擊追殺十餘里適知縣高天寵帶  
團扼截合力奮擊斃賊約三百餘名生擒髮逆  
齊有英等三十二名該逆潰竄桐柏之平氏鎮  
其前踞吳城鎮髮逆亦竄平氏合爲一股往來  
唐泌各境奔突靡定徐榮柱帶兵緊追七月初  
一日該匪直趨南陽郡城徐榮柱由開道繞出

賊前會合民團截勦該匪列隊抗拒我軍施放  
槍礮南陽鎮總兵圖塔納親督兵勇策應匪勢  
稍卻退竄雙橋鋪栗河店等語查粵匪分道入  
豫剽疾異常雖經兵團屢挫其鋒迄未大受懲  
創現已合爲一股約計匪衆七八萬人膽敢攻  
撲郡城盤踞不動亟應厚集兵力迅速殲除現  
在綜計馬步不及賊匪十分之一衆寡懸殊難

操勝算楚省大兵嚴防邊隘逆匪南去無路既  
悉其漸竄漸東勾結汝捻又恐其折回西竄由  
內鄉淅川再入陝境復擾完區臣已將宛屬急  
追情形咨商勝保請卽移師督勦宛匪昨接來  
函有初六日分起拔隊馳赴許州候

有之語伏思此股粵匪人數雖多究屬窮寇如勝保  
振旅南征必易埽除宛屬肅清卽西路無虞竄

突臣未敢稍事拘泥已切實函致勝保請其暫  
緩西行移師赴宛督飭圖塔納等認真勦辦迅  
埽逆氛

鄭元善又奏言正繕摺間據南陽府知府金梁  
馳稟賊匪盤踞雙橋鋪栗河店等處時思渡過  
白河撲城滋擾總兵圖塔納督帶兵勇扼紮北  
岸該匪屢次偷渡均經擊退初四日河水陡落

該匪乘夜鳧水北渡圖塔納督令兵勇奮力截殺該匪拌死渡河約計賊衆不下十萬我軍兵力過單萬難抵禦收隊回城登陴固守該匪四面環攻城上開放大礮轟斃甚多匪衆仍在近城關廂盤踞並據南召縣知縣稟稱匪股一千餘人於初三日翻山擾及該縣之維摩寺南召店各等情查南召在宛郡之西爲上次匪股八

陝舊路臣惟有檄飭各軍實力防勦以遏紛竄  
並函催勝保督師前進迅解城圍兼顧西路奏  
入

上命議政王軍機大臣傳諭官文勝保鄭元善嚴樹  
森曰鄭西退出賊匪由井樓一帶竄至桐柏縣之  
牛氏鎮其前踞吳城鎮髮逆亦竄平氏與該匪合  
而爲一衆約七八萬人現已渡過白河圍撲南陽

郿城盤踞近城闕廟分股擾及南召縣境前因西  
路軍務緊要亟諭勝保督兵駐紮河洛將豫省腹  
地迅速廓清此時宛境被擾賊衆兵單萬分喫緊  
自應先其所急著卽督率兵勇前赴南陽迅速勦  
洗勝保前派之王佐臣一軍現已行抵何處著備  
令先行赴宛會同圖塔納各軍併力兜剿其竄擾  
南召縣維摩寺等處賊匪亟宜設法截勦著勝保

鄭元善酌派得力員弁統帶兵勇繞出賊前迎頭  
截擊杜其入陝之路如有疏虞惟勝保鄭元善是  
問南陽距襄樊不遠該處防兵素稱得力著官文  
等飭令越境夾擊以勦爲防務將此股匪衆聚而  
殲旃毋留餘孽

十七日 戊 駱秉章奏言石逆敗踞長甯日見大  
兵逼近勢難久踞於六月初十日分數萬之衆

攻撲總兵唐友耕營盤我軍槍礮環擊斃賊無  
算該逆屢前屢郤唐友耕見賊勢漸疲開壘縱  
兵出擊斃賊二千餘名賊衆意圖就山紮壘以  
死抗拒唐友耕親督隊伍由右路繞上山梁火  
箭齊發賊卽奔潰將該逆未成之壘概行踏毀  
山下伏賊約三四千人復被我軍轟擊殆盡賊  
向石筍一帶遁回總兵熊煥章一軍初七日移

紮洞底甫築二壘賊分數路撲至熊煥章督隊  
迎敵該逆分股包抄我軍稍卻賊從壘後撲入  
時果殺前營相距不遠聞警馳援賊已乘勢焚  
其棚帳曾傳道督飭果毅各營分途迎擊槍礮  
齊施賊始敗退十一二等日僞宰輔李逆率大  
股屢向洞底一帶衝撲意欲突竄敘府皆被我  
軍擊退殲斃老賊甚多臬司劉嶽昭道員曾傳

理知賊氣已餒遂於十四日分道進剿劉嶽昭  
親督五成隊由蘇家坡進悍賊蠭擁而出我軍  
直前搏戰賊勢不支劉嶽昭派赴銅羅井之軍  
已由左路抄來右路伏兵復出三面夾攻立將  
蘇家坡銅羅井賊巢攻拔合軍乘勝進剿斬擒  
無數復將中峯寺三里坎一帶賊壘踏平賊遂  
敗竄十六日劉嶽昭督軍向龍頭鋪進發前隊

甫至有賊千餘人來撲我軍立刺悍賊數十名  
大股已由長甯出竄曾傳理熊煥章及參將吳  
嘉春分路追至署敘州府知府孫濂等所帶兵  
勇隨同進攻當將長寧縣城克復唐友耕率隊  
馳至石筍一帶遇該逆萬餘人奪路奔竄唐友  
耕揮兵截殺斃慄賊數十人沿途追殺一千餘  
人該逆勢已窮蹙日夜狂奔向興文瀘衛一帶

逃竄臣慮其繞赴納溪偷渡大河檄飭各路官軍節節布置以顧敘府該逆仍由原路回竄敘永廳欲撲永甯縣城適由黔來川之總兵吳安康帶勇行至敘永廳屬之大壩聞賊竄至整隊迎敵立將賊匪擊敗吳安康恐永甯有失督隊兼程前進馳抵永甯城下揮兵力戰該逆不敢進逼吳安康所部已紮營城外代辦敘永廳同

知劉廷植永甯縣知縣衛元燮復率紳團登陴  
固守臣嚴催諸軍兩路追勦並飭合江江津等  
縣嚴防下游務將該逆逼至川黔邊界以圖聚  
殲署長甯縣知縣周于望於城陷日罵賊捐軀  
全家被害仰懇

飭部照同知直隸州知州例從優議卹其家屬及其  
餘文武下落容俟查明辦理此次我軍屢次攻

勦立將長甯克復各營將弁冒暑力戰著有微  
勞尤爲出力之總兵吳安康等應請先行分別  
獎勵其餘出力員弁可否容臣查明保奏出自  
恩施陣亡都司劉立成等均請

飭部從優議卹查遊擊田長翼誤報軍情殊屬玩忽  
相應請

旨革職總兵熊煥章督援不力致棚帳被賊焚燬請

摘去項戴均留營效力以示懲儆奏入

上命議政王軍機大臣傳諭駱秉章曰此次石逆被  
勦窮蹙回竄敘永廳圖撲永甯縣城雖經總兵吳  
安康等揮兵力戰賊不敢逼惟該逆並未大受懲  
創難保不狡焉思逞著駱秉章嚴飭熊煥章唐友  
耕曾傳理各軍分路迅速追勦與吳安康所部合  
力夾擊並飭合江江津等縣嚴防下游毋令偷渡

務將此股巨憝逼至川黔邊界聚而殲旃以靖疆  
圉

上諭內閣曰官軍進攻石逆連破賊壘克復長甯縣  
城餘匪向敘永廳屬奔竄復經總兵吳安康等迎  
剿斬擒多名仍著駱秉章嚴飭在事員弁跟蹤追  
勦迅殄醜類毋留餘孽長甯縣知縣周于堃於城  
陷日罵賊捐軀全家被害著照同知直隸州知州

例從優議卹其家屬被難情形及其餘文武下落  
並著查明具奏尤爲出力之總兵吳安康著賞給  
勝勇巴圖魯名號副將謝景春著賞給固勇巴圖  
魯名號朱湘霖著以總兵補用同知曾傳道著賞  
加知府銜參將羅全新著賞加副將銜補用都司  
張玉春著免補都司以遊擊補用並賞加參將銜  
生員黃鼎著以從九品不論雙單月儘先選用參

將蕭品元李用恆孫均賀連璧均著以副將補用  
遊擊劉正庭張春祈均著以參將補用都司鄒復  
勝著以遊擊補用已革花翎遊擊關志林著開復  
原官翎枝並免繳捐復銀兩都司唐大有著賞加  
遊擊銜守備唐友貴著以都司補用姜星明李洪  
恩林光福均著賞加都司銜千總龔定國劉萬春  
劉宇德均著以守備升用其餘出力員弁著駱秉

章擇尤酌保陣亡都司劉立成千總郭尙三外委  
伍純升王朝用均著交部從優議卹遊擊田長翼  
誤報軍情著卽革職總兵熊煥章督援不力致棚  
帳被焚著摘去頂戴留營效力以示懲儆

十九日

庚子

勝保奏言臣馳抵許州接據鄭元善

函稱粵逆攻撲南陽甚爲喫緊囑臣移師馳往  
督勦又據桐柏泌陽等縣知縣稟稱攻撲縣境

之賊約計十餘萬人情形緊急各等語此股賊匪本係山廬分股竄擾雖因狗逆就擒未敢逞其豕突究未大受懲創後又與漢東大股逆匪會合窺伺楚疆圖擾楚師後路適多隆阿在隨州棗陽德安一帶布置甚爲嚴密復又竄回該逆大股現撲南陽邊馬已至南召境內博望鎮一帶亦有賊蹤查南召在南陽西北博望又在

南召之北若賊由南召入山是又蹈今年夏間竄陝舊轍若由博望北竄則葉裕新鄭一帶卽係北上通衢必須迎頭截擊方免蔓延就一隅而論自應先其所急馳赴南陽就全局而論自應迅統全師先顧河陝蓋粵逆狡詐異常一聞大兵南進必乘虛由南召魯山盧氏一帶撲犯河陝大軍旣已南趨勢不能繞出賊前若跟蹤

追擊又成尾追之勢又探聞逆匪有分股圖竄  
陝西之信臣再四籌思南路固不可無兵勦辦  
而西路尤應加緊豫防查多隆阿一軍本係奉  
旨援陝此時阻在賊南爲所牽掣未能馳往陝省則  
關洛益覺空虛其兵現紮隨州距南陽不及三  
百里可以就近勦辦至鄭元善一軍臣已咨該  
撫察看情形移紮葉裕以固南陽北面仍恐兵

力不敷臣又添派兵勇三千名由副將王佐臣  
管帶馳赴葉裕與參將盧得勝之兵會合防禦  
臣卽遵

旨馳赴河洛駐紮再定進止並請

飭下多隆阿先行籌辦南陽之賊務期認真援勦臣

卽可勻出兵力進紮潼關兼顧關中大局奏入

上命議政王軍機大臣傳諭官文曾國藩勝保多隆

阿鄭元善曰據勝保奏粵逆攻撲南陽甚爲喫緊  
此股逆匪本係由廬州分股出擾又與漢東大股  
會合人數衆多意欲窺伺楚疆以擾楚師後路適  
多隆阿在隨州棗陽一帶布置嚴密又回撲南陽  
兼擾信陽其南召縣之博望鎮一帶已有賊蹤可  
由魯山盧氏撲犯河陝並有圖竄陝省之信等語  
多隆阿一軍已阻於賊之南爲所牽掣不能赴陝

自係實在情形陝省回匪兇殘正熾卽著勝保星  
馳赴陝督辦陝西軍務南陽賊勢甚張著鄭元善  
迅速移兵葉裕親督勦辦務將栗河店踞匪迅行  
攻勦勝保仍飭副將王佐臣之軍與豫軍合力勦  
辦尤須力顧賊由博望北竄之路楚省藩籬最關  
緊要多隆阿旣不能赴陝著官文卽飭多隆阿一  
軍由隨棗前赴南陽力籌防勦與豫省官軍前後

夾擊痛殲醜類曾國荃等軍已逼金陵之雨花臺而兵力尙單曾國藩是否須留多隆阿一軍助勦亦尙未據奏到現在多隆阿之軍應於何處駐紮著曾國藩酌量調派一面迅速具奏

同日馮子材奏言連日據探藩司曾國荃紮營雨花臺布置周密六月二十七八等日僞忠王糾黨攻撲官兵營盤均經擊退其屯聚句容之

賊四出焚掠並有句城逆首彰天義帶賊數千人聲言撲取鎮江等情查逆情叵測其揚言內犯必另有詭謀或聲東擊西或鋌而走險均未可定先經嚴飭南路各營堅壁以待一面派撥精銳各於附城數十里內巡哨察賊所向立卽搜勦使逆隊無從駐足現在上游兵勢甚盛賊黨洶懼其丹陽句容金壇溧水等處尤爲金陵

門戶必以全力護持鎮城偏處逆巢必先自立  
於不敗之地方能因利乘便與上游官軍聯絡  
進取一切防勦情形當函商曾國荃等互相策  
應並隨時稟商督臣曾國藩指授機宜以策萬  
全至鎮防兵勇除旗營城守外約計一萬三千  
餘名臣與鎮將悉心商榷擬令各管帶官認真  
簡閱另編隊伍以一萬人爲率分立五軍以廉

明公正謀勇兼優之大員爲之總統內分二十營每營五百人營各有將層層節制庶幾兵歸實用餉不虛糜奏入

上命議政王軍機大臣傳諭馮子材曰曾國荃一軍禁營雨花臺賊黨攻撲官兵營盤均被擊退難保不東擾鎮江另施詭計現在句容屯聚之賊既有撲取鎮江之信馮子材自應嚴密堵勦毋令賊蹤

竇人並著察探丹陽金壇溧水一帶賊情乘隙進  
攻牽制賊勢以收兩面夾擊之效鎮江與金陵安  
慶一水可通一切戰守機宜自可與曾國荃函商  
並聽候曾國藩調度一面知會都興阿聯絡江北  
聲勢合力會攻至軍營兵勇本不應以老弱充數  
該提督現在簡閱士卒汰去三千以一萬人分立  
五軍選派廉正大員統率層層節制嚴定營規辦

理尙屬認真著卽實力整頓不得有名無實